

CONVENIO ENTRE A CONSELLERÍA DO MEDIO RURAL, A MANCOMUNIDADE INTERMUNICIPAL VOLUNTARIA DO RIBEIRO, A MANCOMUNIDADE DE MUNICIPIOS DA COMARCA DE VERÍN, A MANCOMUNIDADE DE MUNICIPIOS DA COMARCA DO CARBALLIÑO E A MANCOMUNIDADE INTERMUNICIPAL VOLUNTARIA TERRA DE CELANOVA, PARA O DESENVOLVEMENTO DUN PROGRAMA PILOTO NO QUE SE ESTABLECEN 16 BRIGADAS DE PREVENCIÓN E EXTINCIÓN DE INCENDIOS POR UN PERÍODO DE SEIS MESES, COFINANCIADO PARCIALMENTE CO FONDO EUROPEO AGRÍCOLA DE DESENVOLVEMENTO RURAL (FEADER) NO MARCO DO PLAN ESTRATÉXICO DA POLÍTICA AGRARIA COMÚN (PEPAC) 2023-2027

Santiago de Compostela, data da sinatura electrónica

REUNIDOS

Dunha parte a Consellería do Medio Rural, representada neste acto pola Conselleira do Medio Rural, María José Gómez Rodríguez, nomeada polo Decreto 44/2024, do 14 de abril, polo que se nomean os titulares das consellerías da Xunta de Galicia, en virtude das facultades que lle atribúe o artigo 34.1 da Lei 1/1983, do 22 de febreiro, de normas reguladoras da Xunta e da súa presidencia.

Pola Mancomunidade Intermunicipal Voluntaria do Ribeiro, representada neste acto polo presidente, Francisco José Fernández Pérez, actuando no seu nome e representación en virtude das facultades representativas que lle atribúe o artigo 61.1 da Lei 5/1997, do 22 de xullo, da administración local de Galicia.

Pola Mancomunidade de municipios da comarca de Verín, representada neste acto polo presidente, José Luis Suárez Martínez, actuando no seu nome e representación en virtude das facultades representativas que lle atribúe o artigo 61.1 da Lei 5/1997, do 22 de xullo, da administración local de Galicia.

Pola Mancomunidade de municipios da comarca do Carballiño, representada neste acto polo presidente, Fernando Rodríguez Redondo, actuando no seu nome e representación en virtude das facultades representativas que lle atribúe o artigo 61.1 da Lei 5/1997, do 22 de xullo, da administración local de Galicia.

Pola Mancomunidade Intermunicipal Voluntaria Terra de Celanova, representada neste acto polo presidente, Jaime Sousa Seara, actuando no seu nome e representación en virtude das facultades representativas que lle atribúe o artigo 61.1 da Lei 5/1997, do 22 de xullo, da administración local de Galicia.

Todas as partes recoñécense mutuamente plena lexitimación, capacidade e representación, para a sinatura deste convenio e, para estes efectos,

EXPOÑEN

Primeiro. A Consellería do Medio Rural, conforme o disposto no Decreto 223/2022, do 22 de decembro, polo que se establece a estrutura orgánica da Consellería do Medio Rural, é o departamento encargado de xestionar as competencias inherentes ás medidas de prevención e defensa contra os incendios forestais, de acordo co establecido no Estatuto de Autonomía de Galicia, no seu artigo 27, apartado 10, que dispón que lle corresponde á Comunidade Autónoma galega a competencia exclusiva en materia de montes, aproveitamentos forestais e naturais, sen prexuízo do disposto no artigo 149.1.23 da Constitución española.

Segundo. As entidades locais teñen atribuídas, a teor dos artigos 80 da Lei 5/1997, do 22 de xullo, de administración local de Galicia e 25 da Lei 7/1985, do 2 de abril, reguladora das bases de réxime local, competencias en materia de protección do medio ambiente, protección civil e prevención e extinción de incendios.

Terceiro. De acordo co previsto no artigo 31 da LRBRL correspóndelle á provincia asegurar a prestación integral e adecuada, na totalidade do territorio provincial, dos servizos de competencia municipal. Neste contexto, é competencia das deputacións provinciais a cooperación e o fomento do



desenvolvemento económico e social e a planificación no territorio provincial, de acordo coas competencias das demais administracións públicas neste ámbito.

Cuarto. A Lei 3/2007, do 9 de abril, de prevención e defensa contra os incendios forestais de Galicia, establece as medidas preventivas que facilitan a loita contra o lume e que sirvan así mesmo para a posta en valor da potencialidade produtiva, ecolóxica e social do monte galego como base do desenvolvemento sustentable do medio rural.

Así, no artigo 8 establece que as administracións públicas de Galicia colaborarán entre si e cooperarán nas tarefas de prevención e loita contra os incendios forestais, achegando os medios materiais, económicos e humanos á súa disposición.

Tamén no artigo 59 establece que: "A Xunta de Galicia colaborará coas entidades locais para a prevención e a extinción de incendios, ben a través de medios propios ben por medio de mecanismos de apoio económico.

A Xunta de Galicia incluírá nos orzamentos xerais da Comunidade Autónoma dotacións económicas para a sinatura de convenios de colaboración cos concellos para a redacción dos plans municipais de prevención e defensa contra os incendios forestais nos termos establecidos no artigo 16 e para a realización de traballos preventivos en vías e montes de titularidade municipal e na xestión da biomasa das parcelas de propietario descoñecido, determinadas en análises da propiedade de conformidade co establecido no artigo 16.2, e co fin de que poidan ter recursos para exercer as competencias previstas nela consonte o artigo 331.1 da Lei 5/1997, do 5 de agosto, de administración local de Galicia".

Quinto. As accións en materia de prevención dos danos causados aos bosques por incendios, desastres naturais e catástrofes son accións previstas pola normativa europea de axuda ao desenvolvemento rural (Feader) foron incorporadas na intervención 68812: Investimentos forestais en prevención de danos forestais, dentro da cal está a subintervención 68812_08 Colaboración con entidades locais do PEPAC 2023-2027 aprobado por Decisión de execución da Comisión C (2022) 6017 final, do 31 de agosto de 2022, Decisión de execución da Comisión C (2023) 5746 final, do 30 de agosto de 2023 e C(2024) 6133 final, do 30 de agosto de 2024. . En concreto están previstas nas seguintes normas:

- Regulamento (UE) 2021/2115 do Parlamento Europeo e do Consello, do 2 de decembro de 2021, polo que se establecen normas en relación coa axuda aos plans estratéxicos que deben elaborar os Estados membros no marco da Política Agrícola Común (plans estratéxicos da PAC), financiada con cargo ao Fondo Europeo Agrícola de Garantía (Feaga) e ao Fondo Europeo Agrícola de Desenvolvemento Rural (Feader), e polo que se derrogan os Regulamentos (UE) 1305/2013 e (UE) 1307/2013.
- Regulamento (UE) 2021/2116 do Parlamento Europeo e do Consello de 2 de decembro de 2021 sobre o financiamento, a xestión e o seguimento da política agrícola común e polo que se derroga o Regulamento (UE) n° 1306/2013.
- Regulamento Delegado (UE) 2022/127 da Comisión do 7 de decembro de 2021, que completa o Regulamento (UE) 2021/2116 do Parlamento Europeo e do Consello con normas relativas aos organismos pagadores e outros órganos, a xestión financeira, a liquidación de contas, as garantías e o uso do euro.
- Regulamento de Execución (UE) 2022/128 da Comisión do 21 de decembro de 2021 polo que se establecen disposicións de aplicación do Regulamento (UE) 2021/2116 do Parlamento Europeo e do Consello sobre os organismos pagadores e outros órganos, a xestión financeira, a liquidación de contas, os controis, as garantías e a transparencia.



- Regulamento de Execución (UE) 2022/129 da Comisión do 21 de decembro de 2021 polo que se establecen normas para os tipos de intervención relativos ás sementes oleaxinosas, o algodón e os subprodutos da vinificación en virtude do Regulamento (UE) 2021/2115 do Parlamento Europeo e do Consello, así como para os requisitos en materia de información, publicidade e visibilidade relacionados coa axuda da Unión e os plans estratéxicos da PAC.
- Real Decreto 1047/2022, do 27 de decembro, polo que se regula o sistema de xestión e control das intervencións do Plan Estratéxico e outras axudas da Política Agrícola Común.
- Lei 30/2022, do 23 de decembro, pola que se regula o sistema de xestión da Política Agrícola Común e outras materias conexas.
- Real Decreto 147/2023, do 28 de febreiro, polo que se establecen as normas para a aplicación de penalizacións nas intervencións contempladas no Plan Estratéxico da Política Agrícola Común, e modifícanse varios reais decretos polos que se regulan distintos aspectos relacionados coa aplicación en España da Política Agrícola Común para o período 2023-2027.

Sexto. Os incendios forestais constitúen unha grave ameaza para as políticas de desenvolvemento rural, ademais de comprometer a sustentabilidade económica, ambiental e social de Galicia. Actuar contra este desafío esixe promover accións integrais que promovan actuacións preventivas en todo o territorio, con especial intensidade nas zonas de medio e alto risco, de acordo cos plans de prevención e defensa contra os incendios forestais da Xunta de Galicia.

De acordo co disposto na Orde da Consellería do Medio Rural, do 18 de abril de 2007, pola que zonifica o territorio con base no risco espacial de incendio forestal, todos os concellos galegos están declarados de alto ou medio risco de incendio, polo que as actuacións desta índole poden ser obxecto de financiamento Feader.

Sétimo. As entidades locais de Galicia, entre elas as mancomunidades, constitúen o tecido básico territorial sobre o que se ten que desenvolver a política de prevención contra os incendios forestais, polo que a Consellería do Medio Rural, no marco deste convenio, promoven a colaboración económica, para o cofinanciamento de actuacións de prevención e defensa contra incendios forestais a realizar polas brigadas contra os incendios forestais, cunha axuda máxima de 81.000 €/brigada, distribuída, en función do fondo financiador, do xeito seguinte:

1. Para os labores de vixilancia e defensa, cunha axuda máxima de 31.000 € de 5 compoñentes ou de 24.800 € de 4 compoñentes financiado con fondos propios da Comunidade Autónoma.
2. Para os labores de prevención de incendios cunha axuda máxima en función dos traballos realizados, co tope de 50.000 € por cada brigada de 5 ou 4 compoñentes (fondo FEADER).

Os traballos de prevención enmárcanse dentro da subintervención 68812_08 Colaboración con entidades locais do PEPAC 2023-2027 polo que están cofinanciadas polo Feader (80%), pola Administración xeral do Estado (16%) e pola Xunta de Galicia (4 %).

Oitavo: O 07.02.2024 asinou un protocolo de colaboración entre a Consellería de Medio Rural e a Deputación Provincial de Ourense para o desenvolvemento de actuacións conxuntas dirixidas ao mantemento e a conservación das infraestruturas preventivas e da contorna agroforestal para a prevención e defensa contra os incendios forestais. Este protocolo ten como finalidade fixar as bases de colaboración entre as partes asinantes para o desenvolvemento de varias actuacións na provincia de Ourense, dentro das cales está o desenvolvemento deste programa piloto.



Na provincia e Ourense os incendios forestais son un dos principais problemas ambientais, chegando a padecer máis de 1.000 incendios de media por ano nos últimos 10 anos, aspecto que sitúa á provincia como unha das máis afectadas historicamente do Estado e a máis prexudicada na nosa comunidade.

A colaboración que se pretende con este convenio, de claro interese público e social, susténtase no Plan de Prevención e Defensa contra os Incendios Forestais de Galicia (PLADIGA), que reflicte a política e as medidas para a defensa dos terreos forestais e das áreas de influencia forestal, incluíndo o plan de prevención. Este plan contempla como particularidade o emprego de diversos instrumentos para poder levar a cabo as accións que se programan, posto que non se limita á execución das actuacións con medios propios da Consellería do Medio Rural senón que emprega medios doutras administracións e os apoia mediante a sinatura de convenios.

As mancomunidades beneficiadas cumpren cos criterios de selección de operacións vixentes para a subintervención 68812_08 do PEPAC 2023-2027.

E, en virtude do exposto, as partes recoñécense capacidade para comprometerse, en virtude deste convenio, consonte as seguintes

CLÁUSULAS

PRIMEIRA. *Obxecto*

Este convenio ten por obxecto establecer o marco de participación e de colaboración entre a Consellería do Medio Rural, a Mancomunidade Intermunicipal Voluntaria do Ribeiro, a Mancomunidade de municipios da comarca de Verín, a Mancomunidade de municipios da comarca do Carballiño e a Mancomunidade Intermunicipal Voluntaria Terra de Celanova, para o desenvolvemento dun programa piloto no que se establecen 16 brigadas de prevención e extinción de incendios por un período de seis meses (catro brigadas en cada mancomunidade), de xeito que se consiga unha maior eficacia na loita contra estes sinistros a través da optimización no uso de todos os recursos que se inclúen neste convenio.

SEGUNDA. *Financiamento*

1.Os custos das accións a desenvolver neste convenio financiaranse pola Consellería do Medio Rural do seguinte xeito:

Tipos de actuacións	Importe máximo da axuda ano 2025 por brigada de 5 compoñentes	Importe máximo da axuda ano 2025 por Mancomunidade (catro brigadas)	Importe máximo total da axuda ano 2025 (catro mancomunidades)	Proxecto contable	Tipo de fondos
Actuacións prevención incendios	50.000,00 €	200.000,00 €	800.000,00 €	2025 00134	Fondo FEADER+ Cofinanciamento
Actuacións vixilancia e defensa contra incendios	31.000,00 €	124.000,00 €	496.000,00 €	2011 00771	Fondo propio da Comunidade Autónoma
TOTAL ACTUACIÓNS	81.000,00 €	324.000,00 €	1.296.000,00 €		

2. A Consellería do Medio Rural financiará este importe, con cargo á aplicación orzamentaria 15.02.551B.760.0 dos Orzamentos Xerais da Comunidade Autónoma de Galicia para o ano 2025, cofinanciada parcialmente polo Feader no marco PEPAC 2023-2027.



3. Cada actuación aprobada para cada brigada indicadas no cadro do punto 1 desta cláusula xera un expediente administrativo de subvención diferenciado, que se tramita de conformidade coas cláusulas deste convenio e ao abeiro do disposto na Lei 9/2007, do 13 de xuño, de subvencións de Galicia.

TERCEIRA. *Definición das actuacións*

Constitución de 4 brigadas en cada Mancomunidade que desenvolverán as seguintes funcións:

1.- Actuacións en materia de vixilancia e defensa de incendios: unidade composta por 5 ou 4 persoas que realizarán labores de vixilancia e defensa de incendios durante un período de operatividade de 6 meses. Para a súa constitución deberán cumprir as condicións establecidas na cláusula sétima.

2.- Actuacións en materia de prevención de incendios:

a) "Labores de prevención de xeito manual": traballos de roza manual e/ou de investigación do estado das parcelas das redes de faixas secundarias de xestión de biomasa forestal con redacción do informe de xestión de biomasa consonte co establecido na Lei 3/2007, de 9 de abril, de prevención e defensa contra os incendios forestais de Galicia.

b) "Tratamentos preventivos de xeito mecanizado": rozas mecanizada de matogueira con apeiro rozador de cadeas ou similar acoplado a tractor.

Os concellos que integran cada mancomunidade de municipios non poderán levar a cabo os labores de prevención de xeito manual e/ou de xeito mecanizado ao abeiro do "convenio entre a Consellería do Medio Rural e as entidades locais para a realización de accións de prevención e defensa contra os incendios forestais" durante o ano 2025 nas mesmas superficies nas que vaia actuar a mancomunidade de municipios á que pertence.

CUARTA. *Programa de actuacións preventivas (PAP)*

1. O Programa de actuacións preventivas (PAP) é un documento esencial para obter a axuda para estas actuacións, nel a mancomunidade de municipios reflicte a planificación detallada dos traballos de prevención de incendios de xeito mecanizado e dos labores de prevención de xeito manual. Presentarase no prazo máximo dun mes desde a sinatura do convenio, co contido mínimo recollido no anexo I.

2. O PAP presentarase a través da sede electrónica da Xunta de Galicia (<https://sede.xunta.gal>) dirixido á Dirección Xeral de Defensa do Monte da Consellería do Medio rural. Someterase a revisión documental por parte do persoal técnico do distrito forestal e á inspección previa sobre o terreo por parte de persoal funcionario da Consellería do Medio Rural, que verificará as superficies e a viabilidade dos traballos e emitirá un informe no prazo máximo de dez (10) días. De ser favorable, redactarase acta de aprobación do PAP, que será asinada polo Xefe do Distrito Forestal, polo representante da Mancomunidade e polo Xefe do servizo de prevención de incendios forestais de Ourense. Se o informe é negativo, a mancomunidade de municipios deberá modificar o PAP. Unha vez aprobado, o PAP quedará integrado como parte do convenio e posibilitará o inicio dos traballos.

3. A falta de presentación do PAP por parte da mancomunidade de municipios, ou a presentación dun PAP tan defectuoso que imposibilite o desenvolvemento, producirá a perda do dereito ao cobro da axuda para as actuacións en materia de prevención. Non obstante, poderase producir a aprobación parcial para un dos dous tipos de traballos no caso de que a inspección previa sexa favorable.



QUINTA. *Medios necesarios para a realización das actuacións de prevención e de vixilancia e defensa contra os incendios.*

1. A mancomunidade de municipios, para a realización de tratamentos preventivos de xeito mecanizado, de xeito manual e para labores de vixilancia e defensa, deberá realizar as tarefas sinaladas neste convenio cos seus medios propios, ou ben acudir á subcontratación total dos traballos da brigada mediante o procedemento de licitación que corresponda, desenvolvido ao abeiro da Lei 9/2017, de 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014 (LCSP). Non se poderá realizar a subcontratación parcial dunha parte dos traballos.

No caso de que a mancomunidade de municipios contrate a realización das actuacións de prevención está obrigada, independentemente do tipo de contrato e da contía da licitación, a solicitar un mínimo tres (3) ofertas de diferentes provedores que non teñan vinculación entre eles. Esta obriga vén imposta pola esixencia vinculada ao financiamento Feader, consonte o artigo 82 do Real Decreto 1047/2022, do 27 de decembro, polo que se regula o sistema de xestión e control das intervencións do Plan Estratéxico e outras axudas da Política Agraria Común, no que respecta á aplicación dos procedementos de control e á condicionalidade en relación coas medidas de axuda ao desenvolvemento rural, de moderación dos custos propostos, que se avaliarán mediante un sistema adecuado de avaliación, como os custos de referencia, a comparación de ofertas diferentes ou un comité de avaliación. No suposto de non obter resposta/s a esta solicitude, a entidade local presentará, xunto coa xustificación, unha declaración responsable que acredite esta circunstancia.

2. No caso de realización dos traballos da brigada co persoal propio da mancomunidade de municipios, os compoñentes da brigada terán vinculación laboral coa mancomunidade.

3. A mancomunidade de municipios deberá cumprir coa normativa vixente de prevención de riscos laborais para a realización dos traballos aos que se refire este convenio, asumindo as responsabilidades derivadas do incumprimento das súas cláusulas.

SEXTA. *Requisitos do persoal vinculado ás actuacións do convenio como integrante das brigadas*

1. A mancomunidade de municipios certificará que o persoal elixido para as actuacións deste convenio realizou un recoñecemento médico e unha proba física de esforzo para garantir as súas condicións de saúde para a realización do traballo. Na páxina web do Ministerio para a Transición Ecolóxica e o Reto Demográfico existe unha recomendación técnica sobre os procedementos para a elección de persoal para a vixilancia e defensa contra os incendios forestais, onde se describen os procedementos para os bloques de saúde e de condición física:

<https://www.miteco.gob.es/es/biodiversidad/temas/incendios-forestales/seguridad>

A mancomunidade de municipios será responsable de que exclusivamente se incorpore persoal que supere o recoñecemento médico e as probas físicas segundo esta recomendación técnica.

2. A mancomunidade de municipios certificará que o persoal realizou un curso teórico-práctico de formación sobre prevención e a defensa contra os incendios forestais co contido mínimo establecido no anexo II.

Este curso realizarase logo da selección de persoal e con anterioridade ao inicio da operatividade ou, no seu defecto, nos dous primeiros días desta. É unha formación obrigatoria para todo o persoal vinculado ás accións deste convenio, independentemente de que o realizaran con anterioridade.

3. Estas certificacións das mancomunidades de municipios entregaranse ao persoal do distrito forestal con anterioridade ou no momento da realización da inspección previa ao inicio das actuacións.



SÉTIMA. *Composición e dotación das brigadas*

1. Cada brigada que se forme estará composta por:

- a) Unha persoa coa categoría de xefe/a de brigada. Estará en posesión dalgunha das titulacións seguintes: enxeñería de montes, enxeñería técnica forestal, técnico/a superior en xestión forestal e do medio natural, técnico/a en aproveitamento e conservación do medio natural, técnico/a en emerxencias e protección civil ou formación profesional equivalente. Ademais estará en posesión do permiso de conducir do tipo B.
- b) Tres ou catro persoas coa categoría peón de brigada, segundo se constitúa unha brigada de 5 ou 4 compoñentes. Polo menos unha delas deberá contar co permiso de conducir tipo B.

2. As persoas que compoñen a brigada realizarán os labores de prevención de incendios forestais, sempre que non sexan requiridas para a defensa dos incendios, durante cada un dos seus (6) meses de operatividade de cada unha delas, con plena dispoñibilidade, incluíndo domingos, festivos nacionais, autonómicos e locais, así como as quendas de noite necesarias.

3. A mancomunidade de municipios dotará a cada brigada dun vehículo todoterreo durante todo o período de operatividade.

4. Nas labores de vixilancia e defensa de incendios, o/a xefe/a de brigada exercerá como responsable da coordinación do funcionamento da brigada nas relacións operativas e de comunicación co persoal do distrito forestal ao que pertenza a mancomunidade de municipios, de acordo co procedemento operativo establecido no Plan de Extinción do PLADIGA en vigor.

OITAVA. *Períodos de operatividade*

1. Os períodos de operatividade con carácter xeral son:

- Para os labores de vixilancia e defensa: dende o 15.04.2025 ata o 15.10.2025.
- Para os labores de prevención : dende a comunicación do inicio dos traballos ata o 15.10.2025.

2. O comezo de operatividade dos labores de vixilancia e defensa terá lugar o 15 de abril de 2025. Se por causas sobrevidas algunha brigada non pode comezar nesa data, o importe máximo financiado por cada brigada reducirase proporcionalmente ao tempo que tarde en constituírse.

3. Unha vez que obteña a aprobación do PAP, a mancomunidade de municipios notificará a Consellería do Medio Rural, o comezo de operatividade da acción de tratamentos preventivos . Só se terán en conta, á hora da xustificación e pagamento das actuacións, aqueles traballos feitos desde a data de inicio.

NOVENA. *Inexistencia de relación laboral*

A subscripción deste convenio non implicará relación laboral, contractual ou de calquera outro tipo entre as persoas ou os/as profesionais que desenvolvan as accións que constitúen o obxecto do convenio coa Consellería do Medio Rural; de tal xeito que non se poderá esixir á consellería responsabilidade ningunha, nin directa, nin subsidiaria, polos actos ou polos feitos que teñan lugar durante o desenvolvemento deste convenio.



DÉCIMA. *Compromisos das mancomunidades de municipios*

As mancomunidades de municipios comprométese a:

1. Realizar as accións de colaboración de conformidade co disposto neste convenio e no PAP.
2. Someterse ás actuacións de comprobación que, con respecto á xestión dos fondos deste convenio, efectuará a Consellería do Medio Rural e a Deputación Provincial de Ourense, ás de control orzamentario requiridas pola Intervención Xeral da Comunidade Autónoma de Galicia, o Tribunal de Contas e o Consello de Contas no exercicio das súas funcións de fiscalización e control do destino das axudas, así como os controis que poidan realizar as institucións comunitarias respecto das actuacións cofinanciadas parcialmente con fondos comunitarios.
3. Levar un sistema de contabilidade específica Feader, ou ben un código contable axeitado, onde se rexistren as transaccións relativas ás actuacións cofinanciadas, tal e como esixe o artigo 123.2.b) do Regulamento (UE) nº 2021/2115, do 2 de decembro de 2021. Así mesmo, conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control.
4. Asumir a aplicación de medidas antifraude eficaces e proporcionadas no ámbito de xestión da entidade, así como a obriga de comunicar ao órgano xestor os casos de sospeitas de fraude no ámbito dos Fondos Feader, en particular os casos considerados como fraude segundo os artigos 3 e 4 da Directiva (UE) 2017/1371 do Parlamento Europeo e do Consello do 5 de xullo de 2017 sobre a loita contra o fraude que afecta aos intereses financeiros da Unión a través do Dereito Penal.
5. Proporcionar á Autoridade rexional de xestión, aos avaliadores designados ou a outros organismos nos que a dita autoridade delegara a realización deste tipo de tarefas, toda a información necesaria para poder realizar o seguimento e a avaliación do programa, en particular en relación co cumprimento de determinados obxectivos e prioridades, tal como establece o Regulamento (UE) núm. 2021/2115, do 2 de decembro de 2021, no seu artigo 131, o compromiso por parte das persoas beneficiarias de axudas no marco das medidas de desenvolvemento rural.
6. A sinatura deste convenio pola mancomunidade de municipios conleva a declaración do cumprimento dos requisitos establecidos para obter a condición de entidade beneficiaria, segundo o artigos 10 e 11 da Lei 9/2007, do 13 de xuño, de subvencións de Galicia.
7. Acreditar que a mancomunidade de municipios cumpriu o deber de remisión ao Consello de Contas das contas xerais de cada exercicio, de acordo co indicado no artigo 4.1 do Decreto 193/2011, do 6 de outubro, polo que se regulan especialidades nas subvencións ás entidades locais galegas.
8. Dotar o persoal vinculado ás actuacións do convenio, do equipo de protección individual (EPI) e das ferramentas indispensables para realizar as súas funcións de conformidade coa normativa vixente. As características técnicas mínimas dos EPI serán as marcadas polo "Comité de Lucha contra Incendios Forestales" (CLIF) ou polo Plan de prevención e defensa contra incendios forestais de Galicia (Pladiga).
9. No caso de realizar subcontratación das actuacións, realizala de acordo cos procedementos previstos na Lei 9/2017, do 8 de novembro, de contratos do sector público, pola que se transpoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014.



DÉCIMO PRIMEIRA. Compromisos da Consellería do Medio Rural

A Consellería do Medio Rural comprométese a:

1. Comunicar á Base de datos nacional de subvencións (BDNS), para a publicación, toda a información relativa ás axudas recollidas neste convenio, en cumprimento do establecido na Lei 38/2003, de 17 de novembro, xeral de subvencións.
2. Contribuír ao financiamento das actividades obxecto deste convenio nos termos sinalados na cláusula segunda.

DÉCIMO SEGUNDA. Gastos subvencionables e contía da axuda nas accións de prevención de incendios

De conformidade co establecido no artigo 83 apartado 1 e 2 do Regulamento (UE) 2021/2115 do Parlamento Europeo e do consello, para realizar o cálculo do importe máximo para os custos por hectárea e parcela, estableceuse como sistema de cálculo de custos simplificados un baremo estándar de custos unitarios.

Son gastos subvencionables nas actuacións na actuación das brigadas en labores de prevención de incendios os derivados da execución de actuacións de roza e os derivados das actuacións de investigación do estado das parcelas da rede de faixas secundarias, de acordo coa seguinte descrición:

DESCRICIÓN	CUSTO UNITARIO	% DA AXUDA	CUSTO UNITARIO SUBVENCIONADO
Roza mecanizada dunha hectárea de matogueiral, con rozadora de cadeas ou similar en zonas de pendente escasa ou nula (pdte. < 10%) e cunha superficie cuberta de matogueira do 100%	469,92 €/ha	74,48 %	350,00 €/ha
Roza manual tipo 1: hectárea de matogueira con diámetro basal igual ou inferior a 3 cm, en pendentes inferiores ao 50%, e cunha superficie cuberta do 100%, empregando motorrozadora, e respectando aqueles exemplares que, por calquera motivo, deban conservarse.	1.592,27 €/ha	100 %	1.592,27 €/ha
Roza manual tipo 2: hectárea de matogueira con diámetro basal igual ou inferior a 3 cm, en pendentes superiores ao 50%, e cunha superficie cuberta do 100%, empregando motorrozadora, e respectando aqueles exemplares que, por calquera motivo, deban conservarse.	1.698,42 €/ha	100 %	1.698,42 €/ha
Roza manual tipo 3: hectárea de matogueira con diámetro basal comprendido entre 3 e 6 cm. en pendentes inferiores ao 50%, e cunha superficie cuberta do 100%, empregando motorrozadora, e respectando aqueles exemplares que, por calquera motivo, deban conservarse.	2.080,56 €/ha	100%	2.080,56 €/ha
Roza manual tipo 4: hectárea de matogueira con diámetro basal comprendido entre 3 e 6 cm. en pendentes superiores ao 50%, e cunha superficie cuberta do 100%, empregando motorrozadora, e respectando aqueles exemplares que, por calquera motivo, deban conservarse.	2.547,62 €/ha	100 %	2.547,62 €/ha
Ud de investigación de estado de parcela e redacción de informe de xestión de biomasa consonte ao establecido na normativa autonómica de prevención de incendios forestais	12,86 €/parcela	93,30 %	12,00 €/parcela



A contía da axuda será o resultado de multiplicar o custo unitario subvencionado de cada tipo de hectárea rozada e de cada parcela investigada segundo a porcentaxe da axuda establecido no cadro anterior polo número de hectáreas rozadas e parcelas investigadas que consten no informe final de execución do distrito forestal cun importe máximo total de 50.000,00 € para gastos de prevención de incendios, por brigada.

O imposto sobre o valor engadido (IVE) dos gastos das actuacións preventivas é un imposto soportado pola entidade, polo que non é un gasto subvencionable polo Feader.

DÉCIMO TERCEIRA . *Gastos subvencionables e contía da axuda nas accións de vixilancia e defensa contra os incendios*

Son gastos subvencionables na actuación das brigadas en labores de vixilancia e defensa contra os incendios aqueles que de xeito indubidable respondan á natureza da actividade subvencionada neste convenio e que se realicen dende o inicio da operatividade das brigadas ata o prazo de finalización da mesma, que incluírá:

- a) Gastos de persoal: serán subvencionables os custos directos do persoal, incluídos os seguros sociais, que teña vinculación laboral coa mancomunidade de municipios e se asigne para este convenio como compoñentes da brigada.
- b) Gastos de funcionamento e mantemento básico dos vehículos de transporte. Para a imputación destes gastos deberá quedar identificado o vehículo ao que fai referencia o gasto e o tipo de traballo obxecto da axuda.
- c) Gastos dos recoñecementos médicos e das probas físicas esixidas neste convenio para as actuacións de vixilancia e defensa.
- d) Gastos da formación esixida neste convenio para as actuacións de vixilancia e defensa.
- e) Gastos da subministración de EPI.
- f) Gastos da subministración de ferramentas para o persoal das brigadas de vixilancia e defensa. (batelumes, pulaskis e similares).

A contía da axuda será como máximo de 31.000 € por cada brigada de 5 compoñentes ou 24.800 € por cada brigada de 4 compoñentes, podendo ser minorada segundo o establecido na cláusula décimo oitava, punto 1.

3. Para evitar o dobre financiamento a suma dos gastos imputados aos traballos de vixilancia e defensa e os imputados aos traballos de prevención de incendios, unha vez descontados os períodos de inoperatividade, non poderá ser superior ao importe total dos gastos abonados pola mancomunidade de municipios. No caso de as sumas totais superen o custo de persoal, precederá a minoración do importe desta axuda na contía que corresponda.

4. A Consellería do Medio Rural aboará os gastos subvencionables xustificadas debidamente ata o importe máximo por actuación ou a parte proporcional, segundo corresponda, tendo en conta que, de acordo co artigo 42.2 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, para os efectos da súa consideración como subvencionable, considerarase efectivamente pagado o gasto cando quede xustificado o pagamento mediante extractos ou certificacións bancarias debidamente identificados, selados e asinados pola entidade beneficiaria.



DÉCIMO CUARTA. *Pagos anticipados nas actuacións de vixilancia e defensa (Fondos Propios)*

1. A Consellería do Medio Rural poderá realizar pagamentos anticipados, para as actuacións de vixilancia e defensa realizadas polas brigadas de ata o 90% do importe da axuda financiada co fondo propio da Xunta de Galicia (proxección contable 2011 00771), de acordo ao establecido no artigo 63.4 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

2. O pagamento dos anticipos realizarase logo da sinatura do convenio e unha vez que o distrito forestal correspondente emita o informe favorable de inicio da operatividade. No informe farase referencia polo menos a:

A identificación das persoas compoñentes e dos postos que ocupan na composición da brigada, a realización de recoñecemento médico, de probas físicas e de curso de formación, o vehículo todoterreo empregado coa documentación esixida pola normativa aplicable, o EPI e as ferramentas e, finalmente, indicará a data de inicio e de operatividade da brigada.

3. A contía do anticipo modularase en función do manifestado no informe de inicio da operatividade en relación ao número de membros cos que se constitúe a brigada:

- a) brigada de 5 compoñentes: 27.900 €
- b) brigada de 4 compoñentes: 22.320 €
- c) no caso de que algunha brigada atrase o inicio da súa operatividade, o importe do anticipo será o 90 % do importe concedido despois da minoración prevista na cláusula oitava, punto 2.

DÉCIMO QUINTA. *Pagos a conta nas actuacións de prevención de incendios (fondo Feader)*

1. A Consellería do Medio Rural poderá realizar pagos a conta, para as actuacións de prevención de incendios financiadas polo fondo Feader (proxección contable 2025 00134) realizadas por cada brigada, segundo o establecido no artigo 62 do Decreto 11/2009, de 8 de xaneiro, polo que se aproba o Regulamento de la Lei 9/2007, de 13 de xuño, de subvencións de Galicia.

2. O pagamento a conta poderá realizarse, previa solicitude da mancomunidade de municipios, a partir do cumprimento da metade do período de duración da actuación (a partir do 15 de xullo de 2025). A solicitude deberá indicar as actividades realizadas e os resultados obtidos na data da solicitude.

O persoal funcionario da Consellería do Medio Rural, vinculado ao seguimento dos traballos e distinto ao que realizou a inspección previa, emitira un informe de execución parcial. O informe indicará se os traballos solicitados foron realizados de conformidade, especificando as parroquias e/ou lugares e o número de hectáreas realizadas e parcelas investigadas, e deberá coincidir co PAP aprobado pola Comisión de seguimento. Co resultado deste informe poderá realizarse o pago a conta pola contía calculada resultado da multiplicación das unidades de actuación reflectidas no informe de execución parcial polos prezos unitarios detallados na cláusula décimo terceira, coa limitación establecida no punto seguinte.

3. De acordo co establecido no artigo 62.2 do Decreto 11/2009, de 8 de xaneiro, polo que se aproba o Regulamento de la Lei 9/2007, de 13 de xuño, de subvencións de Galicia; o importe dos pagos a conta non poderá ser superior ao 80 % do importe correspondente ao pago xustificado polos traballos de prevención de incendios realizados por cada brigada.



DÉCIMO SEXTA: *Prazo de xustificación final*

O prazo de presentación da documentación xustificativa de todas as actuacións obxecto deste convenio remata o 31 de outubro de 2025.

DÉCIMO SÉTIMA. *Xustificación final das actuacións a presentar polas mancomunidades de municipios*

Cada mancomunidade de municipios presentará a seguinte documentación xustificativa final por cada un dos expedientes administrativos que xera cada actuación do convenio, tendo en conta que o gasto realizado é o que foi efectivamente pagado con anterioridade á finalización do período de xustificación. A documentación presentárase na sede electrónica da Xunta de Galicia (sede.xunta.gal) mediante o formulario PR004A, dirixida á Dirección Xeral de Defensa do Monte, e empregando de xeito obrigatorio os formularios contidos nos anexos deste convenio :

1. Solicitude de pagamento, empregando o formulario do anexo III.1, que contendrá as declaracións seguintes:

- Que a mancomunidade de municipios cumpre as obrigas e os requisitos establecidos neste convenio, de conformidade cos artigos 10 e 11 da Lei 9/2007, do 13 de xuño, de subvencións de Galicia e da súa normativa de desenvolvemento.
- Que a e mancomunidade de municipios comunica ter, ou non, solicitado ou se lle concederon outras axudas para a mesma finalidade.
- Que a mancomunidade de municipios está ao día nas súas obrigas tributarias e fronte á Seguridade Social, que non ten pendente de pagamento ningunha outra débeda coa Administración pública da Comunidade Autónoma e que non é debedora por resolución de procedemento de reintegro.
- Que o IVE dos gastos imputados en materia de vixilancia e defensa contra os incendios forestais para esta mancomunidade de municipios ten a condición de deducible ou de non deducible.
- Que todas as transaccións deste investimento son obxecto de contabilidade diferenciada mediante un código contable específico no sistema contable da mancomunidade de municipios, con indicación expresa da súa vinculación co financiamento Feader.
- Que asume a aplicación de medidas antifraude eficaces e proporcionadas no ámbito de xestión da entidade, así como a obriga de comunicar o órgano xestor os casos de sospeitas de fraude no ámbito dos fondos Feader.

2. Unha memoria de actuación xustificativa, de presentación obrigada mediante o formulario do anexo III.2, do cumprimento das condicións impostas na concesión da subvención, con indicación do total das actividades realizadas e dos resultados obtidos. Nesta memoria deberá indicarse de xeito separado as actuacións de vixilancia e defensa contra incendios das actuacións de prevención.

3. Para as actuacións de vixilancia e defensa contra incendios: Memoria económica de xustificación de gastos, de presentación obrigada mediante o formulario do anexo III.3, asinada polo Secretario/a e polo/a presidente/a, que incluírá:

- A relación nominal das persoas traballadoras adscritas ás actividades obxecto de axuda cos datos de identidade das persoas traballadoras, a indicación de inicio e fin do período de actuación, cos importes das retribucións totais e das cotizacións sociais e con indicación da contía imputada a cada tipo de actuación.
- A relación ordenada e clasificada dos gastos e dos investimentos da actividade, con identificación da persoa acreedora, do número de factura, do importe sen IVE, do importe con IVE,



da data de emisión da factura e da data de pagamento; e con indicación da actuación á que se imputa ese gasto.

4. De ser o caso, a relación de tallada doutros ingresos e/ou subvencións que financiasen a actividade subvencionada, con indicación do importe e a súa procedencia, segundo o disposto no artigo 48.2 e) do Decreto 11/2009, do 8 de xaneiro, polo que se aproba o Regulamento da dita Lei 9/2007, do 13 de xuño, de subvencións de Galicia.

5. Certificación expedida polo órgano que teña as facultades de control contable na mancomunidade de municipios, na que se indique o total de hectáreas rozadas ou do número de parcelas investigadas que se realizaron con medios propios da entidade local e as que se realizaron con medios externos.

6. Acreditación documental, material e/ou gráfica do cumprimento da obriga de información e publicidade do financiamento público da acción subvencionada.

7. No caso de que se acuda a realización das actuacións con medios externos:

a) As ofertas de licitación de servizos externos de actuacións preventivas. No caso de que a entidade local contrate con empresas do sector as accións de realización de tratamentos preventivos –independentemente das obrigas dispostas na Lei 9/2017, do 8 de novembro, de contratos do sector público e na Lei 14/2013, do 26 de decembro, de racionalización do sector público autonómico en materia de límites máximos para aplicar a obriga de solicitar, cando menos, un mínimo tres (3) ofertas de diferentes provedores que non teñan vinculación entre eles– o feito de que o financiamento das actuacións sexa con fondos europeos Feader, impón, consonte o artigo 82 do Real Decreto 1047/2022, do 27 de decembro, polo que se regula o sistema de xestión e control das intervencións do Plan Estratégico e outras axudas da Política Agraria Común, no que respecta á aplicación dos procedementos de control e á condicionalidade en relación coas medidas de axuda ao desenvolvemento rural, moderación dos custos propostos, que se avaliarán mediante un sistema adecuado de avaliación, como os custos de referencia, a comparación de ofertas diferentes ou un comité de avaliación. Por tanto, a esixencia da solicitude dun mínimo de tres (3) ofertas aplicarase independentemente da contía de licitación.

b) Unha relación clasificada de gastos acompañada das facturas xunto co xustificante de pago bancario de cada factura. Os xustificantes bancarios deberán indicar o destinatario do pago, data de pago, nº de factura e importe.

DÉCIMO OITAVA. Actuacións de comprobación: informes finais de operatividade e de execución final de traballos preventivos

1. A actuación das brigadas en labores de vixilancia e defensa durante o período operatividade será obxecto dun informe final de operatividade emitido por persoal funcionario da Consellería do Medio Rural vinculado ao seguimento do convenio, no que se faga constar se a colaboración co SPIF foi satisfactoria ou non, e se a operatividade foi completa.

No caso de que a colaboración non fora totalmente favorable, modificarase á baixa o pagamento da cantidade comprometida no convenio ou revogarase, segundo corresponda. Do mesmo xeito, e no caso de que a certificación reflecta que os medios conveniados non estiveran operativos durante toda a vixencia do convenio, a liquidación a percibir respecto ao total da axuda será minorada na contía establecida neste convenio para estas circunstancias. Para estes efectos o informe reflectirá os días de non operatividade das brigadas.

Non obstante, nos supostos nos que se produza a baixa dun/dunha xefe/a de brigada, non se practica desconto por non operatividade sempre que o resto dos/das compoñentes se integren operativamente noutra das brigadas operativas da mancomunidade de municipios, asumindo a persoa responsable desta brigada a súa dirección durante toda duración da dita baixa. Esta circunstancia



deberá ser comunicada pola entidade, no momento de producirse, ao Distrito Forestal correspondente, que deberá deixar constancia da súa conformidade.

2. En materia de prevención de incendios (manual e/ou mecanizada), o informe de execución final será emitido por persoal funcionario, vinculado ao seguimento dos traballos e distinto ao que realizou a inspección previa. O informe indicará se os traballos foron realizados de conformidade, especificando as parroquias e/ou lugares e o número de hectáreas realizadas e parcelas investigadas, e deberá coincidir co PAP aprobado pola Comisión de seguimento.

O informe deberá detallar: número de hectáreas desbrozadas de xeito mecanizado, número de hectáreas desbrozadas de xeito manual e/ou o número de parcelas investigadas incluídas na rede de faixas secundarias, e dentro destas aquelas que xa foron incluídas no informe parcial de execución, se o houbera.

Con este informe poderase modificar á baixa a cantidade aprobada inicialmente, no caso de que se realice un número de unidades inferior ás aprobadas no inicio nos tratamento preventivos de xeito mecanizado.

DÉCIMO NOVENA . *Pagamento final*

1. A Subdirección Xeral de Prevención da Dirección Xeral de Defensa do Monte é o órgano encargado da instrución do expediente administrativo de xustificación para a posterior tramitación do pagamento das axudas. Unha vez presentada a solicitude de pagamento coa documentación xustificativa e, logo da emisión dos informes finais de execución dos traballos de prevención, esta unidade realizará o control administrativo da solicitude de pago e emitirá a certificación necesaria para o pagamento das actuacións.

Na certificación reflectirase o importe que xustifica a mancomunidade de municipios, o importe que verifica a unidade e o importe a pagar coas minoracións e/ou reducións que procedan segundo se especifica:

a) Minoracións para labores de vixilancia e defensa da brigada:

No período ou períodos nos que as brigadas queden con menos de 3 compoñentes considerarase que a brigada queda na súa totalidade inoperativa.

Así mesmo se considera totalmente inoperativa a brigada cando falte o xefe de brigada (coa excepción do establecido na cláusula décimo oitava, punto 1, terceiro parágrafo).

Nestes casos a axuda anúlase na contía resultante de multiplicar os días de inoperatividade por 170 €/día.

b) Minoracións para labores de prevención de incendios: Redución prevista no artigo 51 do Real Decreto 147/2023, de 28 de febreiro, polo que se establecen as normas para a aplicación de penalizacións nas intervencións contempladas no Plan Estratéxico da Política Agrícola Común, e se modifican varios reais decretos polos que se regulan distintos aspectos relacionados coa aplicación en España da Política Agrícola Común para el período 2023-2027:

A penalización a aplicar calcularase en función dos importes que non resulten subvencionables tras os controis administrativos de cada solicitude de pago. O órgano instrutor examinará a solicitude de pago presentada pola mancomunidade de municipios e determinará os importes subvencionables e os que non o son. Ademais, fixará:

1. O importe pagadoiro ao beneficiario en función da solicitude de pago e da decisión de concesión. No caso de que o primeiro sexa superior ao segundo, o importe solicitado axustarase ao límite da concesión.



2. O importe pagadoiro ao beneficiario tras o exame da subvencionalidade do gasto que figure na solicitude de pago.

Se o importe fixado con arranxo ao punto 1, supera o importe fixado no punto 2 en máis dun 10 %, aplicarase unha penalización ao importe fixado con arranxo ao punto 2. O importe da penalización será igual á diferenza entre eses dous importes, pero non irá máis alá do importe solicitado.

A penalización mencionada aplicarase *mutatis mutandis*, aos gastos non subvencionables detectados durante os controis sobre o terreo.

2. O pagamento final polas actuacións de vixilancia e defensa de realizarse pola contía calculada correspondente logo do desconto do anticipo pagado e polos días de non operatividade, se os houber, sempre que o gasto subvencionable xustificado pola entidade sexa igual ou superior ao importe da contía calculada, en caso contrario o pagamento realizarase por unha contía equivalente ao importe subvencionable xustificado.

3. O pagamento final dos gastos derivados das actuacións de prevención realizarase pola contía calculada resultado da multiplicación das unidades de actuación reflectidas no informe final de execución do distrito polos prezos unitarios detallados na cláusula décimo terceira cos límites máximos establecidos na citada cláusula e minorada, de ser o caso, polos pagos a conta realizados e segundo o apartado b) do punto 1 desta cláusula.

4. O órgano xestor poderá comprobar o valor de mercado dos gastos subvencionables conforme ao disposto no artigo 82 do Real Decreto 1047/2022, do 27 de decembro, polo que se regula o sistema de xestión e control das intervencións do Plan Estratéxico e outras axudas da Política Agraria Común, e no artigo 30.5 da Lei 9/2007, do 13 de xuño, de subvencións de Galicia.

5. A Consellería do Medio Rural resérvase o dereito de solicitar tanta documentación considere precisa, en relación coa xustificación dos gastos.

6. Para os efectos de xustificación destas axudas, os importes xustificadas en cada un dos distintos expedientes xerados polas diferentes accións subvencionadas a cada entidade non son compensables entre si.

VIXÉSIMA. Reintegros

1. Toda alteración das condicións tidas en conta para a concesión das axudas establecidas neste convenio e, en todo caso, a obtención concorrente de subvencións ou axudas outorgadas por outras administracións ou entes públicos ou privados, poderá dar lugar á súa modificación.

2. O incumprimento dalgunha das cláusulas deste convenio, así como a concorrencia dalgunha das causas de reintegro recollidas no artigo 33 da Lei 9/2007, do 13 de xuño, de subvencións de Galicia, dará lugar ao reintegro total ou parcial da axuda recibida e/ou á perda do dereito ao cobro das contías non percibidas.

3. No caso de que exista unha minoración do gasto por calquera das causas anteriores, correspóndelle esta minoración na forma proporcional á achega efectuada.

4. No suposto de reintegro de axudas concedidas con cargo aos fondos propios da Deputación Provincial de Ourense, os xuros de mora esixiranse dende o momento do pagamento da subvención ata a data na que se acorde a procedencia do reintegro, tal e como establece no artigo 33 da Lei 9/2007, do 13 de xuño, de subvencións de Galicia.

5. No suposto de reintegro de axudas concedidas con cargo a fondos Feader, os xuros de mora calcularanse segundo o establecido no artigo 10 da Lei 30/2022, do 23 de decembro, pola que se regula o sistema de xestión da Política Agrícola Común e outras materias conexas: o cálculo dos xuros farase en función do tempo transcorrido entre a expiración do prazo de pago para a persoa



beneficiaria indicado na resolución do procedemento de reintegro e a data de reembolso ou dedución. O prazo de devolución indebido non poderá ser superior en máis de dous meses dende a data de resolución.

VIXÉSIMA PRIMEIRA . *Incompatibilidade de axudas*

As axudas concedidas neste convenio son incompatibles con calquera outra de réxime comunitario para a mesma finalidade. Así mesmo, no suposto de que o importe do convenio, illadamente ou en concorrencia con axudas doutras administracións públicas ou privadas, supere o total do custo da actividade, procederase ao reintegro do exceso percibido.

VIXÉSIMO SEGUNDA. *Publicidade*

1. Este convenio será obxecto de publicación e inscrición, de conformidade co disposto no artigo 15 da Lei 1/2016, do 18 de xaneiro, de transparencia e bo goberno da Administración pública galega. As partes asinantes consenten expresamente a inclusión e a publicidade dos seus datos persoais e demais especificacións recollidas neste convenio, no Portal de transparencia e Goberno aberto e no Rexistro de convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de convenios da Xunta de Galicia.

Así mesmo, as partes asinantes do convenio manifiestan o seu consentimento para que os datos persoais que constan nel, así como o resto das especificacións contidas nel poidan ser publicados no Portal de transparencia e goberno aberto.

2. Asemade, en materia de fondos Feader (rozas manuais e mecanizadas) as obrigas en materia de publicidade veñen recollidas no Regulamento de execución (UE) 2022/129 da comisión do 21 de decembro de 2021 e no disposto na "Instrucción AXR PEPAC 01/2023 de inforamción, publicidade e visibilidade" (<https://pdr-mediourural.xunta.gal/gl/pepac/publicidade>):

"Todas as actividades de información e publicidade que leven a cabo as persoas beneficiarias deberán destacar o apoio dos fondos á operación incorporando:

- a. O logo da Xunta de Galicia.
- b. O emblema da Unión Europea e, xunto a el, a declaración «Financiado pola Unión Europea» ou «Cofinanciado pola Unión Europea», que figurará sen abreviar.
- c. O logotipo xeral oficial do Ministerio de Agricultura, Pesca e Alimentación (MAPA).
- d. Referencia á axuda do Feader a través do PEPAC, indicando o cofinanciamento pola Unión Europea, a porcentaxe de cofinanciamento e o montante total da axuda.

Cando a persoa beneficiaria dispoña dun sitio web e/ou contas oficiais nas redes sociais, deberá incorporar, ademais do disposto no punto anterior, unha breve descrición da operación que recibe os fondos europeos, de maneira proporcionada ao nivel da axuda, e indicará os seus obxectivos e resultados.

As intervencións que reciban unha axuda pública total superior a 10.000 euros deberán colocar, polo menos, un panel de tamaño A3 (300x450mm), ou pantalla electrónica equivalente, nun lugar ben visible no terreo onde se realicen as actuacións obxecto de subvención, que fará referencia clara e inequívoca á axuda concedida con expresión dos datos identificativos desta orde, acompañados polo logotipo da Xunta



de Galicia e da Consellería de Medio Rural, e o do Ministerio de Agricultura, Pesca e Alimentación, destacando a axuda financeira recibida pola Unión (*modelo do cartel: punto 3.4 da instrución indicada*)."

VIXÉSIMA TERCEIRA. *Comisión de seguimento*

Constitúese unha Comisión de seguimento como mecanismo de actuación conxunta para o seguimento, a coordinación e a avaliación das actuacións estipuladas no convenio . A dita comisión, que se reunirá a petición de calquera das partes, estará integrada pola persoa titular da Subdirección Xeral de Prevención (ou persoa en quen delegue), que a presidirá; por unha persoa funcionaria do distrito forestal que corresponda por razón do territorio, designada pola Dirección Xeral de Defensa do Monte, por unha persoa en representación da Deputación Provincial e por unha persoa en representación de cada unha das Mancomunidades .

O dito órgano colexiado rexerese polo disposto na Lei 40/2015, do 1 de outubro, de réxime xurídico do sector público.

VIXÉSIMO CUARTA. *Información básica sobre a protección de datos de carácter persoal*

As partes asinantes virán obrigadas, en materia de protección de datos, a cumprir co Regulamento (UE) núm. 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos) e coas demais disposicións vixentes sobre a materia.

Os datos de carácter persoal aos que se teña acceso en virtude deste convenio serán tratados por ambas as dúas partes asinantes coa finalidade de levar a cabo a tramitación administrativa que se derive da súa xestión.

O tratamento dos datos baséase no exercicio de poderes públicos conforme á normativa recollida nas cláusulas do convenio e ás referencias recollidas na páxina <https://www.xunta.gal/información-xeral-proteccion-datos>. Con todo, determinados tratamentos poderán fundamentarse no consentimento das persoas interesadas.

As persoas interesadas poderán solicitar o acceso á rectificación e supresión os seus datos, así como exercitar outros dereitos ou retirar o seu consentimento, a través da sede electrónica da Xunta de Galicia, ou de xeito presencial, nos lugares e rexistros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/proteccion-datos-persoais>.

Así mesmo, en aplicación deste convenio respectaranse cantas esixencias establece a Lei Orgánica 3/2018, do 5 de decembro, de protección de datos e garantía dos dereitos dixitais, adoptando as medidas que resulten necesarias para cumprir as súas previsións e, en particular, para garantir a seguridade e a integridade dos datos e a súa protección fronte a alteracións, a perdas, a tratamentos ou a accesos non autorizados.

VIXÉSIMO QUINTA. *Modificación e extinción do convenio*

Este convenio poderá ser obxecto de modificacións ou de prórrogas xustificadas, logo da tramitación da addenda correspondente, e seguindo todos os trámites necesarios para a formalización oportuna.

O convenio poderá extinguirse polas causas xerais admitidas en dereito e, en particular, por mutuo acordo das partes, por circunstancias que imposibiliten a realización das actuacións previstas e/ou por incumprimento dos compromisos e das obrigas establecidas. Os reintegros ou as perdas de dereito



xeradas por estes incumprimentos tramitaranse segundo o disposto no Título II da Lei 9/2007, do 13 de xuño, de subvencións de Galicia.

VIXÉSIMO SEXTA. *Réxime xurídico*

Este convenio réxese polas súas cláusulas e, no seu defecto, estarase ao disposto na Lei 9/2007, do 13 de xuño, de subvencións de Galicia; no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño; na Lei 38/2003, de 17 de novembro, xeral de subvencións e nos principios establecidos na Lei 39/2015, do 1 de outubro, do procedemento administrativo común das administracións públicas e na Lei 40/2015, do 1 de outubro, do réxime xurídico do sector público.

As posibles discrepancias que poidan xurdir na súa aplicación e/ou interpretación resolveranse por diálogo directo entre as partes ou pola Comisión de seguimento. As controversias non resoltas serán sometidas á xurisdición contencioso-administrativa, de conformidade coa Lei 29/1998, do 13 de xullo, reguladora da xurisdición contencioso-administrativa.

VIXÉSIMO SÉTIMA. *Vixencia*

Este convenio producirá efectos dende a sinatura e ata o 31 de decembro de 2025.

En proba de conformidade con canto antecede, asinan este convenio, no lugar sinalado no encabezamento.

A conselleira do Medio Rural
María José Gómez Rodríguez

O presidente da Mancomunidade de municipios
da comarca do Carballiño
Fernando Rodríguez Redondo

O presidente da Mancomunidade
Intermunicipal Voluntaria do Ribeiro
Francisco José Fernández Pérez

O presidente da Mancomunidade Intermunicipal
Voluntaria Terra de Celanova
Jaime Sousa Seara

O presidente da Mancomunidade de municipios
da comarca de Verín

José Luis Suárez Martínez



ANEXO I: Contido mínimo do Plan de Actuacións Preventivas (PAP)

O Plan de Actuacións Preventivas deberá ter o seguinte contido mínimo:

1.Ámbito de actuación das actuacións preventivas

Realizaranse os traballos de prevención de incendios, dentro do territorio dos municipios que intergran cada Mancomunidade, en:

- Vías e camiños forestais, áreas de devasas ou nas faixas de xestión da biomasa de titularidade municipal.
- Superficies sobre as que a mancomunidade de municipios teña a cesión de aproveitamento, uso e/ou desfrute realizada por parte das persoas responsables de acordo co artigo 21 ter da Lei 3/2007, de 9 de abril, de prevención e defensa contra os incendios forestais de Galicia.
- Superficies de persoa propietaria descoñecida, previa a acreditación da dita condición.
- Zonas de servidume de camiños e valgadas dentro das zonas de xestión de biomasa.
- Parcelas incluídas na rede de faixas secundarias de xestión de biomasa do concello (en caso de investigación do estado de xestión da biomasa de parcelas).

2.Tipos de traballo obxecto de axuda:

- Actuacións preventivas manuais como rozas, rareos e eliminación posterior de restos, cos importes máximos de axuda por hectárea establecidos no punto 1.4. Estes traballos poderanse realizar en zonas mecanizables sempre que existan circunstancias que tecnicamente o aconsellen (superficies reducidas, existencia de obstáculos físicos e similares).

-Traballos de investigación do estado das parcelas da rede de faixas secundarias de xestión de biomasa forestal e redacción do informe de xestión de biomasa consonte co establecido na normativa autonómica de prevención de incendios forestais.

- Tratamentos preventivos mecanizados: consistirán en actuacións mecanizadas mediante rozas co obxecto de diminuír a carga de combustible. No caso de roza de faixas auxiliares en marxes de vías incluírase nesta actuación a roza de noiros e/ou da plataforma cando sexa necesario, contabilizando a súa superficie.

3.Xustificación das superficies obxecto de actuación

- As actuacións a realizar atenderán ao previsto na planificación do distrito forestal en materia preventiva e deberán estar en concordancia co Plan de prevención e defensa contra os incendios forestais de Galicia (Pladiga) e o plan municipal de prevención e defensa contra os incendios forestais (se o houbera).
- Debe existir unha xustificación que amose criterios obxectivos na selección das parcelas propostas de actuación e teña como obxectivo fundamental a redución e a descontinuidade do combustible mediante tratamentos silvícolas preventivos.
- As superficies incluídas no Plan de Actuacións presentado non poderá incluír superficies que os concellos membros da Mancomunidade presentaran no PAP do convenio entre a Consellería de Medio Rural e as entidades locais de Galicia para a realización de actuacións de prevención e defensa contra os incendios forestais do ano 2025.



4. Táboa resumo de superficies obxecto de actuación

Deberá incluírse unha táboa resumo coas superficies de actuación propostas, desagregando entre traballos mecanizados, manuais e de investigación de parcelas e dentro destes:

- Parcelas ou vías de actuación coa descrición, cando menos, da parroquia e o lugar (potestativamente, as referencias catastrais ou as parcelas SIXPAC).
- No caso de investigación de parcelas da rede de faixas secundarias de xestión de biomasa, quedarán excluídas as que xa sexan obxecto de inspección ao abeiro do convenio de colaboración suscrito entre a Xunta de Galicia, a Fegamp e SEAGA en materia de prevención e defensa contra incendios forestais para o establecemento dun sistema público de xestión da biomasa nas faixas secundarias ou ao abeiro do convenio de colaboración entre a Xunta de Galicia, FEGAMP e deputacións provinciais, en materia de prevención e defensa contra incendios forestais, para o desenvolvemento dos grupos de emerxencias supramunicipais.
- No caso de actuacións de roza manual, a superficie proposta deberase desagregar:
 - Roza manual 1: superficie de actuación con pendente inferior ao 50% e diámetro basal da matogueira igual ou inferior a 3 cm (1.605,90 €/ha).
 - Roza manual 2: superficie de actuación con pendente igual ou superior ao 50% e diámetro basal da matogueira igual ou inferior a 3 cm (1.712,96 €/ha).
 - Roza manual 3: superficie de actuación con pendente inferior ao 50% e diámetro basal da matogueira comprendido entre 3 e 6 cm (2.098,38 €/ha).
 - Roza manual 4: superficie de actuación con pendente igual ou superior ao 50% e diámetro basal da matogueira comprendido entre 3 e 6 cm (2.569,44 €/ha).

5. Cartografía

Cartografía con planos sobre mapas oficiais, preferentemente a escala 1:5:000 ou 1:25:000, na que se reflectan as actuacións preventivas propostas. A escala desta documentación non terá que verse alterada por ampliacións ou reducións de fotocopiado.

No caso de propoñer traballos de investigación de parcelas da rede de faixas secundarias, bastará con indicar a parroquia na que se realizarán os traballos, non sendo obrigatorio a planimetría.



ANEXO II: Curso teórico-práctico de formación sobre prevención e defensa contra incendios forestais

A mancomunidade de municipios certificará que o persoal realizou un curso teórico-práctico de formación sobre prevención e a defensa contra os incendios forestais de 16 horas, que será impartido por persoal competente na materia do curso –enxeñeiro/a de montes ou enxeñeiro/a técnico/a forestal– co contido seguinte:

- A prevención e a defensa contra os incendios forestais en Galicia, 1 h
- Comportamento do lume. Factores que inflúen na evolución do lume, 1 h
- Ferramentas, 1 h
- Extinción e liquidación, 1,5 h
- Condución de vehículos todoterreo, 0,5 h
- Seguridade laboral en incendios forestais, 1 h
- Primeiros auxilios, 2 h
- Traballo co vehículo motobomba 2,5 h
- Liñas de defensa e ferramentas, 2,5 h
- EPI e comunicacións, 1 h
- Seguridade e saúde e partes, 1 h
- Medios aéreos de embarque e desembarque. Posición de seguridade en descargas, 1 h

Este curso realizarase logo da selección de persoal e con anterioridade ao inicio da operatividade ou, no seu defecto, nos dous primeiros días desta. É unha formación obrigatoria para todo o persoal vinculado ás accións deste convenio, independentemente de que o realizaran con anterioridade.



**ANEXO III.1
SOLICITUDE DE PAGAMENTO**

CONVENIO ENTRE A CONSELLERÍA DO MEDIO RURAL, A MANCOMUNIDADE INTERMUNICIPAL VOLUNTARIA DO RIBEIRO, A MANCOMUNIDADE DE MUNICIPIOS DA COMARCA DE VERÍN, A MANCOMUNIDADE DE MUNICIPIOS DA COMARCA DO CARBALLIÑO E A MANCOMUNIDADE INTERMUNICIPAL VOLUNTARIA DA TERRA DE CELANOVA, PARA O DESENVOLVEMENTO DUN PROGRAMA PILOTO NO QUE SE ESTABLECEN 16 BRIGADAS DE PREVENCIÓN E EXTINCIÓN DE INCENDIOS POR UN PERÍODO DE SEIS MESES, COFINANCIADO PARCIALMENTE CO FONDO EUROPEO AGRÍCOLA DE DESENVOLVEMENTO RURAL (Feader) NO MARCO DO PLAN ESTRATÉXICO DA POLÍTICA AGRARIA COMÚN (PEPAC) 2023-2027

DATOS DA MANCOMUNIDADE SOLICITANTE	NIF

E, NA SÚA PRESENTACIÓN

NOME	PRIMEIRO APELIDO	SEGUNDO APELIDO	NIF

EN CALIDADE DE (CARGO/POSTO QUE DESEMPEÑA)

--

SOLICITA:

O pagamento da subvención para as actuacións correspondentes ao exercicio 2025, executadas e xustificadas segundo o establecido no CONVENIO DE REFERENCIA e demais normativa aplicable.

E DECLARA:

- Que a axuda foi destinada ao fin para o que se concedeu.
- Que en relación con outras axudas concedidas ou solicitadas:
A entidade entidade local non solicitou e non se lle concederon axudas para a mesma finalidade das distintas administracións, entes públicos ou privados.

A entidade local si solicitou e se lle concederon, ou están pendentes de resolución de concesión, das distintas administracións, entes públicos ou privados as seguintes:

DESCRICIÓN DA AXUDA, CONCEPTO e ORGANISMO FINANCIADOR	ESTADO (1)	IMPORTE (€)
TOTAL		

(1) Indicar (S) SOLICITADA E PENDENTE DE RESOLUCIÓN/(C) CONCEDIDA



3. Que a entidade local cumpre as obrigas e requisitos que se desprendan do articulado desta orde e dos artigos 10 e 11 da Lei 9/2007, do 13 de xuño, e da súa normativa de desenvolvemento.

4. Que a entidade local está o día das súas obrigas tributarias e fronte á Seguridade Social, que non ten pendente de pagamento ningunha outra débeda coa Administración pública da Comunidade autónoma e que non é debedora por resolución de procedemento de reintegro.

5. Que o IVE dos gastos imputados en materia de vixilancia e defensa contra os incendios forestais para esta entidade local ten a condición de:
deducible

non deducible

6. Que todas as transaccións deste investimento son obxecto de contabilidade diferenciada mediante un código contable específico no sistema contable da entidade local con indicación expresa da súa vinculación con financiamento Feader.

9. Que a asume a aplicación de medidas antifraude eficaces e proporcionadas no ámbito de xestión da entidade, así como a obriga de comunicar ao órgano xestor os casos de sospeitas de fraude no ámbito dos Fondos Feader.

DOCUMENTACIÓN QUE SE PRESENTA:
Memoria de actuación xustificativa e económica de actuacións realizadas.
Memoria económica de xustificación de gastos
Xustificación da solicitude de tres ofertas de diferentes empresas provedoras para contratación de servizos.
Facturas e xustificante de pago bancarios
Acreditación documental, material e/ou gráfica do cumprimento da obriga de información e publicidade do financiamento público da acción subvencionada.
Certificación expedida polo órgano que teña as facultades de control contable na mancomunidade de municipios, na que se indique o total de hectáreas rozadas ou do número de parcelas investigadas que se realizaron con medios propios da entidade local e as que se realizaron con medios externos.
Outros documentos:

SINATURA DA PERSOA REPRESENTANTE

....., na data da sinatura dixital.

Documento asinado electrónicamente.

O presidente/a



ANEXO III.2	
MEMORIA DE ACTUACIÓN XUSTIFICATIVA	
NUM. EXPTE.	<i>(BRIGADA 01, BRIGADA 02, BRIGADA 03 OU BRIGADA 04)</i>
ENTIDADE LOCAL	
CIF	
CONVENIO/ADDENDA	Convenio entre a Consellería do Medio Rural, a Mancomunidade Intermunicipal Voluntaria do Ribeiro, a Mancomunidade de municipios da comarca de Verín, a Mancomunidade de municipios da comarca do Carballiño e a Mancomunidade Intermunicipal Voluntaria Terra de Celanova, para o desenvolvemento dun programa piloto no que se establecen 16 brigadas de prevención e extinción de incendios por un período de seis meses, cofinanciado parcialmente co fondo europeo agrícola de desenvolvemento rural (Feader) no marco do plan estratéxico da política agraria común (PEPAC) 2023-2027

ACTUACIÓNS DE EXTINCIÓN DE INCENDIOS:

A brigada _____estivo contratada dende o _____ ata o _____ cos seguintes traballadores:

Traballador	Categoría	Data inicio	Data fin
	<i>(xefe brigada/peón)</i>		

IMPORTE DE PAGAMENTO SOLICITADO DAS ACTUACIÓNS DE <u>EXTINCIÓN DE INCENDIOS</u> (máximo 31.000 €)	
--	--

ACTUACIÓNS DE PREVENCIÓN DE INCENDIOS:

Achegado o correspondente Programa de Actuacións Preventivas para a revisión por parte do distrito forestal. Unha vez revisado polo distrito forestal, a Comisión de seguimento aprobouno o, co que se iniciaron os traballos o

Os traballos a desenvolver conforme ao disposto neste convenio e aprobados no PAP son:



A) ACTUACIONES PREVENTIVAS EXECUTADAS DE XEITO MECANIZADO E RESULTADOS OBTIDOS

Tratamentos preventivos de xeito mecanizado			
Parroquia	Lugar	Parcelas SIXPAC ou ref. catastrais (<i>potestativo</i>)	Superficie (ha)
Total superficie executada			

B) ACTUACIONES PREVENTIVAS EXECUTADAS DE XEITO MANUAL E RESULTADOS OBTIDOS

Traballos de prevención de forma manual (Rozas manuais)				
Parroquia	Lugar	Parcelas SIXPAC ou ref. catastrais (<i>potestativo</i>)	Tipo de traballo	Superficie (ha)
			(Roza 1, Roza 2,...)	
Total superficie executada				

Traballos de prevención de forma manual : Parcelas investigadas			
Parroquia	Lugar	Parcelas SIXPAC ou ref. catastrais (<i>potestativo</i>)	Nº de parcelas
Total unidades executadas			



RESUMO DAS ACTUACIÓNS DE PREVENCIÓN			
Actuación	Unidades	Prezo unidade	Subtotal
Has. Roza mecanizada		350 €/ha	
Has. Roza manual 1		1.592,27 €/ha	
Has. Roza manual 2		1.698,42 €/ha	
Has. Roza manual 3		2.080,56 €/ha	
Has. Roza manual 4		2.547,62 €/ha	
Uds investigación parcelas		12 €/ud	
		Total	

IMPORTE DE PAGAMENTO SOLICITADO DAS ACTUACIÓNS DE PREVENCIÓN DE INCENDIOS (máximo 50.000 €)	
--	--

Asinado dixitalmente, na data da sinatura dixitalmente

O presidente/a



